

O B A V J E Š T E N J E

Ministarstvo komunikacija i prometa Bosne i Hercegovine daje na Javne konsultacije **Prednacrt Odluke o usvajanju Dokumenta o korištenju elektronskih komunikacionih mreža u Institucijama Bosne i Hercegovine.** Pozivamo sve zainteresovane građane, institucije i organizacije da dostave svoje komentare i prijedloge do 02. decembra 2013. godine.

Molimo da sve eventualne prijedloge, komentare i sugestije dostavite na obrascu, koji je sastavni dio ovog dokumenta, putem pošte na adresu: Ministarstvo komunikacija i prometa Bosne i Hercegovine, Trg BiH 3, 71 000 Sarajevo ili putem elektronske pošte na adresu: brislav.zimonjic@mkt.gov.ba.

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), i člana 3. Odluke o usvajanju Politike softvera u Institucijama Bosne i Hercegovine Hercegovine, a u vezi sa tačkom 3.9. Politike softvera u Institucijama Bosne i Hercegovine ("Službeni glasnik BiH", broj 143/07), na prijedlog Ministarstva komunikacija i prometa Bosne i Hercegovine, Vijeće ministara Bosne i Hercegovine na _____. sjednici održanoj _____ 2013. godine, donijelo je

O D L U K U
O USVAJANJU DOKUMENTA O KORIŠTENJU ELEKTRONSKIH
KOMUNIKACIONIH MREŽA U INSTITUCIJAMA BOSNE I HERCEGOVINE

Član 1.
(Predmet Odluke)

Ovom Odlukom usvaja se Dokument o korištenju elektronskih komunikacionih mreža u Institucijama Bosne i Hercegovine (u daljem tekstu: Dokument) koji je dat u prilogu ove Odluke i njen je sastavni dio.

Član 2.
(Djelokrug primjene)

Dokument iz člana 1. ove Odluke primjenjuje se u svim Institucijama Bosne i Hercegovine.

Član 3.
(Stupanje na snagu)

Odluka stupa na snagu danom donošenja i objavljuje se u "Službenom glasniku BiH".

VM broj /13
_____ 2013. godine
Sarajevo

Predsjedavajući
Vijeća ministara BiH
Vjekoslav Bevanda, s. r.

DOKUMENT O KORIŠTENJU ELEKTRONSKIH KOMUNIKACIONIH MREŽA U INSTITUCIJAMA BOSNE I HERCEGOVINE

Dokument o korištenju elektronskih komunikacionih mreža u Institucijama Bosne i Hercegovine (u daljem tekstu: Dokument) definiše uslove službenog, prihvatljivog, neprihvatljivog i nezakonitog pristupa elektronskim komunikacionim mrežama, odnosno, podacima, drugim elektronskim komunikacionim mrežama i Internetu od strane zaposlenih u Institucijama Bosne i Hercegovine (u daljem tekstu: Institucije BiH), kao i odgovornost zaposlenih i službe za informaciono-komunikacione tehnologije.

Ovaj Dokument se odnosi na sve zaposlene u Institucijama BiH, kao i na lica koja obavljaju privremene ili povremene poslove ili poslove na osnovu posebnog ugovora, izuzev zaposlenika u Institucijama BiH, koji u okviru svojih nadležnosti za poslovanje koriste elektronske komunikacione mreže za posebne namjene i sisteme uslovnog pristupa.

Institucije BiH koje u okviru svojih nadležnosti za poslovanje koriste elektronske komunikacione mreže za posebne namjene i sisteme uslovnog pristupa obavezne su donijeti interni dokument o načinu i uslovima korišćenja elektronskih komunikacionih mreža za posebne namjene i sistema uslovnog pristupa.

Predmetni dokument usklađen je sa standardom BAS ISO/IEC 27001:2007 - Informaciona tehnologija - Sigurnosne tehnike - Sistemi za upravljanje sigurnošću informacija - Zahtjevi, u dijelu koji se odnosi na bezbjedno korišćenje elektronskih komunikacionih mreža (A10.Upravljanje komunikacijama i operacijama i A11.Kontrola pristupa).

Pojedini pojmovi upotrijebljeni u ovom dokumentu imaju slijedeće značenje:

- a) **“Baza podataka”** je uređena grupa podataka pohranjena na sistemski način tako da računarski program tj. klijent može poslati upit bazi podataka na koji ona odgovara. Podaci se u bazu podataka mogu upisivati, brisati i mijenjati, dok rezultat upita može biti pretraživanje, sortiranje, pregledanje, upoređivanje po zadatom kriterijumu, razni proračuni i sl;
- b) **“Elektronska komunikaciona mreža”** predstavlja složeni sistem koji omogućava prenos i razmjenu informacija između elektronskih uređaja, žičanim, optičkim ili elektromagnetnim putem, bez obzira na vrstu informacije koja se prenosi;
- c) **“Elektronska komunikaciona mreža za posebne namjene”** predstavlja mrežu organa državne uprave nadležnih za zaštitu i spašavanje, kao i službi za hitne intervencije, te se ne koristi se u komercijalne svrhe;

- d) **“Informacioni sistem”** predstavlja sistem za prikupljanje, obradu, prenos, pohranu i distribuciju informacija, te ih čini dostupnim i upotrebljivim;
- e) **“Informaciono-komunikacione tehnologije - IKT”** predstavljaju skup informacionih tehnologija koje se koriste u procesu prikupljanja, odabira, obrade, prenosa, verifikacije, skladištenja, prikaza, objavljivanja i dijeljenja informacija u procesima komunikacije, kod kojih su jasno razdvojene komponente informacije i komunikacije;
- f) **“Institucije Bosne i Hercegovine”** su Vijeće ministara Bosne i Hercegovine, sve agencije, direkcije, te ostale institucije osnovane od strane Vijeća ministara Bosne i Hercegovine i Parlamentarne skupštine Bosne i Hercegovine, a u skladu sa Zakonom o upravi i Zakonom o ministarstvima i drugim tijelima uprave Bosne i Hercegovine;
- g) **“Internet”** je globalna računarska mreža, sačinjena od velikog broja međusobno povezanih računarskih mreža i uređaja, koja omogućava razmjenu podataka između računara;
- h) **“Intranet”** je korištenjem raspoložive IKT opreme u okviru Institucije Bosne i Hercegovine ili angažovanjem spoljne firme registrovane za pružanje usluga Internet-a;
- i) **“Komunikacija”** predstavlja razmjenu ili prenošenje informacija između određenog broja sudionika, putem javno dostupnih elektronskih komunikacionih mreža i usluga;
- j) **“Prava pristupa”** predstavljaju prava definirana dodjeljivanjem privilegija na određene sadržaje ili dijelove sistema, jednom ili više korisnika ili korisničkih grupa, putem kojih korisnik može nad dodijeljenim dijelom da vrši određene promjene;
- k) **“Prenosni računar”** predstavlja računar čija je težina obično u rasponu od 1 do 6 kg, u zavisnosti od veličine, materijala i drugih konstruktivnih komponenti;
- l) **“Pristup”** označava omogućavanje dostupnosti sredstava ili usluga korisnicima, pod određenim uslovima i prema jasno definisanim pravilima korištenja, radi pružanja elektronskih komunikacionih usluga, uključujući usluge putem kojih se pružaju usluge informacionog društva ili predaju usluga sadržaja, što, između ostalog, obuhvata: pristup dijelovima mreže i pripadajućoj infrastrukturi i opremi, koji može sadržavati i priključenje opreme putem fiksnih ili bežičnih mreža, pristup fizičkoj infrastrukturi uključujući zgrade, kablovsku kanalizaciju i antenske stubove, pristup odgovarajućim softverskim sistemima, pristup informacionim sistemima i bazama podataka, pristup fiksnim i mobilnim mrežama, pristup sistemima uslovnog pristupa, kao i pristup virtuelnim mrežnim uslugama;

- m) **“Radna stanica”** podrazumjeva desktop, laptop ili drugi računar kojim se služe korisnici sistema u svrhu efikasnijeg i bržeg obavljanja svakodnevnih radnih zadataka, te u svrhu komunikacije i razmjene podataka.

1. Korisnici elektronskih komunikacionih mreža

Korisnikom elektronskih komunikacionih mreža smatra se svako lice koje koristi računarsku opremu, računarske programe i baze podataka, razvija programe i aplikacije za podršku poslovnom procesu, kreira, organizuje i održava baze podataka te koristi računar kao samostalnu radnu stanicu ili kao radnu stanicu na mreži.

Administrator elektronskih komunikacionih mreža je autorizovani korisnik sa specijalnim ovlaštenjima za rad sa računarom, računarskim programima, bazama podataka, sa ovlaštenjima pristupa do računara kao samostalne radne jedinice ili kao jedinice na mreži, a za potrebe administriranja i nadzora upravljanja računarskom i mrežnom opremom.

Administrator elektronskih komunikacionih mreža imenuje odgovorna osoba ispred Institucije BiH, ukoliko pomenuti poslovi nisu sistematizovani radnim mjestom zaposlenog.

2. Način korišćenja informatičke opreme i elektronskih komunikacionih mreža

Personalni računari, samostalni ili povezani u elektronske komunikacione mreže, sa pripadajućim aplikacijama i podacima, kao i ostala informatička oprema smiju se koristiti isključivo za poslovne potrebe i u okviru ovlašćenja za obavljanje poslova.

Korisnici informatičke opreme dužni su se pridržavati pravila za korištenje informatičke opreme i provoditi sve predviđene procedure i tehnička uputstva za korištenje informatičke opreme.

Tehničke zahvate na informatičkoj opremi (promjena konfiguracije, zamjena pojedinih dijelova opreme) smiju obavljati samo za to ovlašćena lica ili ovlašćeni serviseri koji će podatke tehničkog i poslovnog značaja čuvati kao poslovnu tajnu. U slučajevima da je za neke podatke određen visok stepen tajnosti tehnički zahvati na informatičkoj opremi vršiće se uz nadzor ovlašćenog lica ispred Institucije BiH i to isključivo na lokaciji gdje je smještena informatička oprema. Svako premještanje računara ili njihovih perifernih uređaja sa jedne lokacije na drugu odobrava, izvodi i evidentira ovlašćena osoba ispred Institucije BiH. Zastarjela oprema može se zamjeniti ili staviti van upotrebe samo od strane ovlašćenog lica ispred Institucije BiH, uz obrazloženje koji su razlozi za zamjenu ili stavljanje van upotrebe.

3. Ciljevi u oblasti korištenja elektronskih komunikacionih mreža

Ciljevi regulisanja odnosa u oblasti korištenja elektronskih komunikacionih mreža u Institucijama BiH, zasnivaju se na:

- obezbjeđivanju uslova za ravnomjeran razvoj i korišćenje elektronskih komunikacija u svim Institucijama BiH;
- obezbjeđivanju dostupnosti usluga Internet servisa svim zaposlenim u Institucijama BiH, koji upotrebljavaju računar za obavljanje svakodnevnih poslova;
- obezbjeđivanju međupovezivanja elektronskih komunikacionih mreža i usluga;
- obezbjeđivanju maksimalne koristi za korisnike elektronskih komunikacionih mreža;
- obezbjeđivanju stalnog unapređenja kvaliteta usluga elektronskih komunikacionih mreža;
- obezbjeđivanju mogućnosti zaposlenim da, prilikom korišćenja elektronskih komunikacionih mreža i usluga, slobodno pristupaju i distribuiraju informacije, kao i da koriste aplikacije i usluge prema utvrđenim uslovima i pravilima;
- obezbjeđivanju visokog nivoa zaštite podataka o ličnosti i privatnosti zaposlenih prilikom pristupanja elektronskim komunikacionim mrežama, a u skladu sa propisima o zaštiti ličnih podataka;
- obezbjeđivanju da svi zaposleni u Institucijama BiH, koji upotrebljavaju računar za obavljanje svakodnevnih poslova, ostvaruju pravo na pristup elektronskim komunikacionim mrežama, pod uslovima i načelima koji su određeni ovim Dokumentom, a koji nisu u suprotnosti sa javnim redom, životom i zdravljem zaposlenih, kao i nacionalnom i javnom bezbjednošću;
- obezbjeđivanju da Institucije BiH podstiču zaposlene na upotrebu elektronskih komunikacionih mreža u lociranju, prikupljanju i korištenju podataka u procesu obavljanja svakodnevnih radnih zadataka, razmjeni informacija korisnih za izvršavanje radnih zadataka;
- obezbjeđivanju uslova razvoja vještina za efikasno i svrsishodno korištenje elektronskih komunikacionih mreža, te obezbjeđivanju maksimalne koristi za korisnike elektronskih komunikacija u pogledu stručnog i profesionalnog usavršavanja.

4. Prihvatljivo korištenje elektronskih komunikacionih mreža

Prihvatljivim korištenjem elektronske komunikacione mreže od strane zaposlenih u Institucijama BiH smatra se korištenje:

- u cilju pristupanja stručnim, naučnim, tehničkim i drugim informacijama u vezi njihovog profesionalnog angažmana u Institucijama BiH i obavljanja svakodnevnih radnih zadataka;
- u svakodnevnoj komunikaciji sa drugim institucijama u cilju što efikasnijeg obavljanja radnih zadataka;
- u cilju stručnog i profesionalnog usavršavanja za poziciju na kojoj rade;
- u cilju pristupanja informacijama vezanim za razvoj opštih sposobnosti za kvalitetno obavljanje poslova;
- u cilju pristupanja Internet društanim mrežama kao i drugim video i audio sadržajima, isključivo iz profesionalnih razloga, a u svrhu ostvarivanja poslovnih komunikacija, te

prikupljanja informacija relevantnih za efikasnije obavljanje poslova i radnih zadataka koji ne utiču negativno na produktivnost;

- u cilju učestvovanja u komunikaciji korištenjem servisa elektronske pošte i na drugi način ukoliko takve komunikacije imaju veze sa obavljanjem posla u svrhu ostvarivanja i održavanja poslovnih kontakata. Obavezno je čuvanje elektronske pošte koja je od značaja za poslovne procese. Ako u toj komunikaciji zaposleni izražava vlastiti stav, u istoj mora biti uključeno posebno upozorenje koje objašnjava da je to njegov stav, a ne stav Institucije BiH.

5. Neprihvatljivo korištenje elektronskih komunikacionih mreža

Neprihvatljivim korištenjem elektronskih komunikacionih mreža od strane zaposlenih u Institucijama BiH smatra se:

- pristup, pretraživanje, štampanje tekstualnih, grafičkih i multimedijalnih informacija pornografskog sadržaja;
- proizvodnja dječije pornografije, distribucija ili prenošenja dječije pornografije, pribavljanja dječije pornografije za sebe ili druge, posjedovanja dječije pornografije u računarskom sistemu ili na mediju za čuvanje računarskih podataka;
- pokretanje Internet programa, uključujući, ali ne ograničavajući se na on-line igre, testove i druge zabavne sadržaje, kao nosioca potencijalne opasnosti po bezbjednost računarskih sistema Institucija BiH;
- obavljanje bilo kojih aktivnosti koje na bilo koji način štete ugledu Institucije BiH i krše norme ponašanja zaposlenih;
- obavljanje privatnih aktivnosti ili aktivnosti koje donose profit poput kupovine roba koje nisu za ličnu i porodičnu upotrebu, primanja usluga online, prodaja roba, pružanja usluga i reklamiranje istih;
- uključanje u bilo koju aktivnost političkog lobiranja, promovisanja političkih stranaka, skupljanja sredstava za iste i ostale političke aktivnosti;
- korišćenje elektronskih mreža radi širenja informacija sa ciljem raspirivanja nacionalnog, etničkog ili religijskog sukoba, zatim distribuisanje rasističkih i ksenofobičnih pisanih materijala, slika, kao i širenja ideja ili teorija kojima se promoviše, omogućava ili inicira mržnja, diskriminacija ili nasilje protiv nekog lica ili grupe;
- upotreba elektronskih mreža unutar informacionog prostora i sredstava kojima se ugrožavaju osnovna ljudska prava i slobode;
- slanje i prosljeđivanje lančane elektronske pošte koja uključuje uputstva za prosljeđivanje poruke drugima;
- slanje bilo kakvog sadržaja koji je “ofanzivan”, a koji primaocu može stvoriti neprilike, nanijeti štetu, ili je obmanjujući;
- pokretanje izvršnih datoteka ako se ne zna o čemu se radi i da li je izvor pouzdan.

6. Nezakonito korištenje elektronskih komunikacionih mreža

Nezakonito korištenje elektronskih komunikacionih mreža je ono korištenje koje je suprotno propisima kojima se uređuju korištenjem elektronskih mreža kao i svaka namjerna aktivnost kojom se ugrožava elektronska komunikaciona mreža Institucije BiH.

7. Bezbjednost računara i informacija

Zaposlenim u Institucijama BiH nije dozvoljeno ugrožavanje bezbjednosti računara i informacija. Kako bi se očuvala bezbjednost računara i informacija nisu dozvoljene slijedeće radnje:

- pristupanje informatičkim resursima Institucija BiH sa udaljenih lokacija, a koji nije u vezi sa obavljanjem službenih poslova;
- dobivanje neovlaštenog pristupa informatičkim resursima Institucija BiH;
- neovlašćeno brisanje, izmjena, oštećenje, prikrivanje ili na drugi način činjenje neupotrebljivim računarskih podataka ili programa;
- neovlašćeno onemogućavanje pristupa servisima ili računarima onima koji imaju pravo na pristup;
- uništavanje ili namjerno onemogućavanje rada računara ili korištenje drugog uređaja za elektronsku obradu i prenos podataka sa namjerom onemogućavanja ili ometanja postupka elektronske obrade i prenosa podataka, a koji su od značaja za Institucije BiH;
- neovlašten pokušaj razotkrivanja računarske lozinke, pristupne šifre ili sličnog podatka, kojim bi se omogućilo pristupanje cjelini ili nekom dijelu računarskog sistema;
- otkrivanje šifri, pristupnih procedura ili mrežne konfiguracije trećoj strani;
- slanje povjerljivih ili zaštićenih informacija na nezaštićen način;
- izrada računarskih virusa i drugih štetnih programa u namjeri njihovog unošenja u računar drugog korisnika ili računarsku mrežu Institucije BiH;
- unošenje netačnih podataka, ili lažno prikazivanje podataka i na taj način direktno uticati na rezultat elektronske obrade i prenosa podataka u namjeri da sebi ili drugom pribavi protivpravnu imovinsku korist i time prouzrokuje Instituciji BiH imovinsku štetu;
- kršenje mjera zaštite na način neovlašćenog pristupanja računarima ili elektronskoj komunikacionoj mreži, te neovlašćeno pristupanje elektronskim podacima;
- namjerna čin ozbiljnog neovlaštenog sprečavanja funkcionisanja računarskog sistema unošenjem, prenošenjem, oštećivanjem, brisanjem, kvarenjem, mijenjanjem ili činjenjem neupotrebljivim računarskih podataka;
- neovlašćeno postavljanje ili skidanje programa;
- obavljanje bilo koje aktivnosti koja bi mogla ugroziti bezbjednost bilo kog računara ili informacija Institucije BiH;

- ugrožavanje informatičkih resursa Institucije BiH putem zagušenja ili prekida komunikacionog kanala slanjem masovnih poruka putem elektronske pošte kao ni pretplata službene adrese na primanje elektronske pošte koja nije vezana za posao.

8. Odgovornosti zaposlenih

Zaposleni u Institucijama BiH, kao i sva lica koja obavljaju privremene ili povremene poslove ili poslove na osnovu posebnog ugovora

- obavezni su zaštititi određene računarske podatke, a naročito kada postoji osnova za sumnju da su računarski podaci podložni mogućnosti uništenja ili mijenjanja;
- obavezni su pravilno koristiti elektronske komunikacione mreže i pridržavati se kulture komuniciranja putem javnih servisa korištenjem dostupnih „online“ kurseva, kao i učešćem na obukama iz oblasti IKT-a, koje organizuju nadležne institucije;
- obavezni su da na zahtjev odgovornog lica ispred Institucije BiH dostave određene računarske podatke koje taj zaposlenik posjeduje ili kontroliše, a koji su sačuvani u računarskom sistemu ili na mediju za čuvanje računarskih podataka;
- odgovorni su za racionalno korištenje elektronskih komunikacionih mreža u cilju izbjegavanja problema vezanih za ograničenost računarskih i mrežnih kapaciteta Institucije BiH;
- ne smiju koristiti elektronske komunikacione mreže u bilo koju svrhu koja može negativno uticati na Instituciju BiH;
- odgovorni za pridržavanje bezbjednosnih politika i procedura u korištenju servisa elektronskih mreže;
- da se uzdržavaju od bilo koje prakse koja može ugroziti računarske sisteme i podatke Institucije BiH, uključujući, ali ne ograničavajući se na računarske viruse koji mogu biti preuzeti sa Interneta;
- obavezni su poštovati posebne zahtjeve koji su postavljeni na neke sadržaje elektronskih mreža, kao što su ugovori o korištenju istih, pravo o privatnosti korištenja i autorska prava;
- odgovorni su za sadržaj svih tekstova, zvučnih zapisa ili slika koje objavljuju ili šalju upotrebom elektronskih komunikacionih mreža;
- dužni su, ukoliko sumnjaju da je njihov računar zaraženi virusom, isti odmah isključiti i o tome obavijestiti ovlaštenu osobu nadležnu za provođenje mjera zaštite sigurnosti;
- obavezni su se pridržavati odredbi propisa kojima se uređuju autorska i srodna prava;
- obavezni su se pridržavati odredbi ugovora o korištenju autorski zaštićenog softvera;
- zabranjena je instalacija, izmjena i deinstalacija bilo kakvog softvera na radnu stanicu, osim zaposlenim koji su ovlašteni za takvu vrstu posla.

Zaposleni u informatičkim službama Institucija BiH, kao i svi ostali zaposleni, koji imaju pristup povjerljivim podacima obavezni su iste čuvati u tajnosti, te ih na adekvatan način

zaštititi kako isti ne bi bili dostupni drugim osobama te su obavezni potpisati izjavu o čuvanju tajnosti podataka.

Svaki mrežni i Internet kontakt zaposlenih, ostvaren korištenjem elektronske pošte i domene registrovane na Instituciju BiH, može stvoriti dojam kod drugih da takav pristup odražava zvanični stav Institucije BiH, stoga svi zaposleni moraju da posjeduju visok stepen svijesti o tome. Ukoliko zaposleni u takvom kontaktu izražava vlastiti stav, u istom mora biti uključeno posebno upozorenje koje objašnjava da je to lični stav, a ne zvanični stav Institucije.

9. Osiguranje servisa

Odsjek za održavanje i razvoj sistema elektronskog poslovanja i „e-vlade“, koji je u sastavu Generalnog sekretarijata Savjeta ministara Bosne i Hercegovine, obezbjeđuje Institucijama BiH, koje su povezane na informacioni sistem Savjeta ministara Bosne i Hercegovine, pristup Intranetu. Institucije BiH koje nisu povezane na informacioni sistem Savjeta ministara Bosne i Hercegovine samostalno obezbjeđuju pristup Intranetu.

Institucije BiH obezbjeđuju svim zaposlenim, koji upotrebljavaju računar za obavljanje svakodnevnih poslova, korišćenje Internet usluga, kao i elektronsku poštu sa domenom registrovanom na Instituciju BiH, dok upotreba elektronske pošte sa domenom koja nije registrovana na Instituciju BiH, nije dozvoljena.

Odgovorno lice ispred Institucije BiH ima pravo odlučiti da li zaposleni u obavljanju svojih poslova imaju potrebu za korišćenjem Internet usluga i pristupom podacima drugih Institucija BiH. U slučaju prestanka radnog angažmana zaposlenog, istom se oduzimaju prava po pitanju pristupa elektronskoj mreži u okviru Institucije BiH.

10. Praćenje mrežne komunikacije

Odlukom odgovorne osobe ispred Institucije BiH elektronska mrežna komunikacija može biti praćena kako bi se nadgledao rad elektronske komunikacione mreže, u cilju pravovremenog otkrivanja i rješavanja eventualnih problema u mrežnom okruženju.

Praćenje podrazumjeva evidenciju mrežnih aktivnosti u cilju izrade analize mrežnog saobraćaja, te kontrole racionalnog trošenja mrežnih kapaciteta. Praćenje ne podrazumijeva čitanje elektronske pošte ili dokumenata zaposlenih u Institucijama BiH. Čitanje elektronske pošte ili dokumenata zaposlenih može se preduzeti samo ukoliko postoji opravdana sumnja u počinjenje krivičnog djela, u skladu sa zakonom propisanom postupku.

O B R A Z L O Ž E N J E

I PRAVNI OSNOV

Pravni osnov za donošenje ove Odluke sadržan je u članu 17. Zakona o Vijeću ministara Bosne i Hercegovine („Službeni glasnik BiH“, broj 30/03, 42/03, 81/06, 76/07, 81/07, 94/07 i 24/08) prema kojem, Vijeće ministara Bosne i Hercegovine u ostvarivanju svojih prava i ovlaštenja donosi odluke.

Članom 3. Odluke o usvajanju Politke softvera u Institucijama Bosne i Hercegovine Hercegovine, a u vezi sa tačkom 3.9. Politike softvera u Institucijama Bosne i Hercegovine ("Službeni glasnik BiH", broj 143/07) predviđeno je donošenje dokument o korištenju elektronskih komunikacionih mreža u Institucijama Bosne i Hercegovine.

II RAZLOZI ZA DONOŠENJE

Donošenje Dokumenta je zakonska obaveza utvrđena na 23. sjednici Vijeća ministara Bosne i Hercegovine Odlukom o usvajanju Politike softvera u Institucijama Bosne i Hercegovine, broj 143/07 od 20. 9. 2007. godine, a koja je donešena na osnovu člana 17. Zakona o Vijeću ministara Bosne i Hercegovine („Službeni glasnik BiH“, broj 30/03, 42/03, 81/06), u skladu sa Strategijom razvoja informacionog društva Bosne i Hercegovine, Politikom razvoja informacionog društva u Bosni i Hercegovini i Akcionim planom razvoja informacionog društva u Bosni i Hercegovini, usvojenim na 69. sjednici Vijeća ministara Bosne i Hercegovine, održanoj 16. 11. 2004. godine.

Cilj donošenja Dokumenta je definisanje uslova službenog, prihvatljivog, neprihvatljivog i nezakonitog pristupa elektronskim komunikacionim mrežama, odnosno podacima Institucija Bosne i Hercegovine, kao i drugim elektronskim mrežama i Internetu od strane zaposlenih u Institucijama Bosne i Hercegovine kao i odgovornosti zaposlenih i informatičke službe. Dokument definiše granicu između prihvatljivog i neprihvatljivog korištenja Interneta u privatne svrhe. Predmetni Dokument usklađen je sa standardom BAS ISO/IEC 27001:2007 - Informaciona tehnologija - Sigurnosne tehnike - Sistemi za upravljanje sigurnošću informacija - Zahtjevi, u dijelu koji se odnosi na bezbjedno korišćenje elektronskih komunikacionih mreža (A10. Upravljanje komunikacijama i operacijama i A11. Kontrola pristupa).

III OBRAZLOŽENJE PREDLOŽENIH RJEŠENJA

Članom 1. ove Odluke definisan je predmet Odluke.

Članom 2. ove Odluke utvrđen je djelokrug primjene Dokumenta o korištenju elektronskih komunikacionih mreža u Institucijama Bosne i Hercegovine.

Članom 3. ove Odluke propisano je stupanje na snagu i objava Odluke.

IV FINANSIJSKA SREDSTVA

Za realiziranje ove Odluke nije potrebno izdvojiti sredstva iz Budžeta institucija i međunarodnih obaveza Bosne i Hercegovine za 2013. godinu.

V OPIS KONSULTACIJA VOĐENIH U PROCESU IZRADE PROPISA

O Prijedlogu odluke pribavljena su pozitivna mišljenja Ministarstva finansija i trezora Bosne i Hercegovine, Ministarstva pravde Bosne i Hercegovine i Ureda za zakonodavstvo Vijeća ministara Bosne i Hercegovine.